

LEHEN MINISTRO OHIAK DIOENEZ, «PIRINIOEZ BESTALDEKO EGOERAREKIN» EZIN DA ZER GERTATUKO DEN JAKIN

# Mauroy: «Departamendua sortzea Frantziak Espainiari egin ezin dion itsuskeria da»

■ Euskal Departamenduaren eskaera «konprenitzen» badu ere, ez dela une egokia uste du Pierre Mauroyk

■ Egun Euskal Departamendua sortzeak «ondorio neurtezinak» lituzke, Mitterrand garaiko lehen ministro ohiaren ustez

■ Daniel Vaillant Frantziako Barne ministroak ez zien erantzun nahi izan kazetarien galderei, «Miarritzen izanagatik»

Hur Gorostiaga / Miarritze

PIERRE MAUROY François Mitterranden lehen agintaldi-ko lehen ministro sozialistak, Euskal Departamendua sortzearen kontra ez dagoela eta eskaera koprenitzen duela adierazi zuen atzo Miarritzen, eta «Errepublikak bat eta zatiezinenaren baitako egitura» litzatekeela azpimarratu. «Hala ere, Pirinioez bestalde-ko dagoen bortizkeria egoerak zuhurtziaz aritu beharra» galdegiten duela gehitu zuen. «Ondorioz, konprenitzen dut Gobernuak oraingoz sortu nahi ez izatea», gehitu zuen.

Pierre Mauroyren arabera, Euskal Departamendua sortzeak «ondorio neurtezinak» izan litzake Ipar Euskal Herrian. «Pirinioez bestalde-ko egoerarekin, ez dakigu zer gerta litekeen. Ez dugu menperatuko ez genukeen egoera batera heldu behar. Inork ez dezake kontrolatu pasioen kateatzeak ekar ditzakeen ondorioak», azpimarratu zuen.

«Gaur egungo egoeran, bederen, ez dut uste sortu beharko litzatekeenik. Ez da egungo arazoa, errealismo politikoa da, ez da erabaki konponezirik hartu behar»,



ANGELA MEJIAS

Mauroy (ezker) departamenduare aldekoekin egon zen kanpoan, Joel Brec Miarritzeko sozialistarekin besteak beste.

gehitu zuen lehen ministro ohiak.

Pierre Mauroy Euskal Departamenduaren aldeko kideekin eta kontrakoekin bildu zen. Euskal Departamendua sortzeari uko eginik, Frantziako Gobernuaren «keinu politikoa» dela adierazi zien Mauroyk. Euskal Departamenduaren aldeko haute-

tsiekin biltzean, «Euskal Departamenduaren sortzea Frantziak Espainiari egin ez diezaiokeen gauza itsusia» dela erran zien.

## Departamendua egitura baliagarria

Hala ere, departamendua Frantzian desagertu behar

den egitura dela diotenei eze-tzarekin erantzun zien Mauroyk: «Departamendua eraldatu eta modernizatu behar den egitura baldin bada ere, erabat erabilgarria da». Hain zuzen ere, gaur egun Frantziako administrazioaren egituraketa departamenduen arabera dela adierazi zuen, Estatuaren zerbitzu

guztia departamenduetako prefeturen arabera osaturik baitaude.

Heldu den urteko martxoan egitekoak diren kantonamendu hauteskundeak «azkenak» izan daitezten opa zuen Mauroyk, 2004 urterako departamendu mailako zerrendak osatu beharra azpimarratzeko. Gisa berean, Kontseilu Nagusiko ordezkariak hautatzeko hauteskundeak bi zatitan egitea ez dela zentzuzkoa adierazi zuen.

Eguerdian, Miarritzeko Festibalen Jauregitik ateratzean Euskal Departamendua galdeginez kartelada bat egiten ari zirenekin une batez gelditu zen Pierre Mauroy. Joel Brec Miarritzeko hautetsi sozialista departamenduzalea tartean zela, François Mitterrandekin 1981 urtean egin zuen Euskal Departamenduaren sorrerarako lege proposamenaren kopia eman zioten eskura, «oraino eskaera bera» egiten dutela gehiturik. Bertan ziren ere arratsaldean berarekin biltzekoak zirenak, baita Vincent Bru (UDF) Kanboko auzapeza, Xabi Larralde (AB) eta Sauveur Bacho (CFDT), Erik Dolosor (ELB) eta Aitor Arandia (EAJ), besteak beste.

Pierre Bidart eta Jacques Betbeder izan ziren Euskal Departamenduaren kontrako ordezkari

■ PIERRE MAUROY Euskal Departamenduaren aldeko eta kontrako ordezkari-ekin bildu zen. Kontrakoak Pierre Bidart bai-gorriar sozialista eta Izpegi editorialeko arduna eta Jacques Betbeder CAP-Vivre ensemble (Pirinio eta Aturriko hiritarra-Elgarrekin bizi) elkarte-ko lehendakaria izan ziren, eta hamar mi-

nutuz mintzatu ziren Mauroyekin.

«Euskal Departamendua gutiengo baktek Euskadi eta Nafarroarekin nahi duen indenpentziarako lehen urratsa» dela adierazi zuten kontrakoek, Betbederrek adierazi zuenez. «Beti aldekoak bakarrik entzuten dira, hedabideek kontrakoak isiltzen dituzte», adierazi zuen. Mi-

chel Alliot-Marie eta Jean Espilondo diputatuak kontra daudela adierazi zuen. CAP Elkartearen baitan ultraeskuindarrak ere badaudela aitortu zuen Betbederrek, eta «komunistetarik MNR Megreten mugimendura arteko jendea» biltzen dutela erran. Euskal Departamendua «etnizismoa» dela erran zuen.

Euskal Departamenduaren aldekoek «egiazko erreferenduma» galdegin zuten

■ EUSKAL Departamenduaren aldeko dozena bat hautetsi eta ordezkari politiko oren erdi batez mintzatu ziren Pierre Mauroyekin. «Herritarrek beren nahia hainbat aldiz iritzi bilketen bidez eman ondoren, egiazko erreferendum bat egiteko garaia da», adierazi zuen Jean Aniozbehere Sarako auzapez eta Euskal

Departamenduaren aldeko Hautetsien elkarte-ko lehendakariak.

Mauroyk Euskal Departamendua ez emateko arrazoia «Hegoaldeko bortizkeria egoeran» zela eta «egoera konpontzen ez dela ikusirik, Iparraldekoak noiz arte itxaroten egon behar ote duten» azaldu zioten. «Departamendu batekin pre-

feta indartsu bat ezar litekeela ohartarazi zuten.

Frantxua Maitia, Colette Capdevielle, Jean Falagan, Albert Pery sozialistak, Ramuntxo Kanblong eta Aniozbehere jeltzaleak, Jakes Abeberri eta Panpi Dirassar ABkoak, Leopold Darritxon eta Jean Rene Etxegarai UDFkoak izan ziren besteak beste.